



ՎԵՀԱՓԱՌԻ ՀԱՅՐԱՊԵՏԸ Ս. ԳԵՂԱՐԴԱ ՎԱՆՔՈՒՄ

Հունիսի 27-ը մեծ ուրախության օր էր Այրիվանքի միաբանության համար: Վեհափառ Հայրապետը ուխտի պիտի գար Ս. Գեղարդա վանք: Ցերեկվա ժամը մեկին, ուղեկցությամբ Գերագույն Հոգևոր Խորհրդի ատենապետ գերաշնորհ Ս. Սիոն արքեպիսկոպոս Մանուկյանի, Մայր Աթոռի դիվանապետ Ս. Ներսես եպիսկոպոս Պոպապալյանի, Արարատյան Հայրապետական թեմի առաջնորդական փոխանորդ Ս. Գարեգին եպիսկոպոս Ներսիսյանի, Նոր Նախիջևանի և Ռուսաստանի առաջնորդական տեղապահ Ս. Տիրան վարդապետ Կյուրեղյանի, ինչպես նաև Մայր Աթոռի ֆինանսական բաժնի վարիչ պր. Գառնիկ Քեհյալյանի ու միջեկեղեցական հարաբերությունների բաժնի քարտուղար պր. Պարզև Շահբալյանի, Նորին Սրբությունը ժամանեց Ս. Գեղարդա վանք: Պատշաճ ընդունելությունից հետո, Վեհափառ Հայրապետը իր ուղեկիցներով առաջնորդվեց տաճար: Պատմական տաճարի սրբազան կամարների ներքո տիրեց խորհրդավոր լռություն: Այգիս Սրբավանդույն Հայրապետը մեր Ս. Եկեղեցու, ազգի, ինչպես նաև աշխարհի հարատև խաղաղության մտահոգությունները իր հոգում, գլխահակ աղոթում էր՝ հաստատմպես համոզված լինելով, որ աշխարհի և մեր ժողովրդի վաղվա ապահովությունը անպայմանորեն կապված է Աստուծո պարգևած խաղաղության հետ: Աղոթքից հետո Վեհափառ Հայրապետը վանահոր առաջնորդությամբ դիտեց Ս. Գեղարդա վանքի ողջ համալիրը՝ մի անգամ ևս հիանալով մեր շինարար ու ստեղծագործ նախնիների տաղանդով: Աստուծո փառքի համար կերտված աղոթքի այս տները կառուցելիս մեր նախնիները թափանցել են ժայռերի խորքը՝ երկնելու համար զարմանահորաջ, անպուգական ժայռափոր տաճարների այս շարքը: Տաճարի համալիրը դիտելուց հետո, Նորին Սրբությունը դիտեց նաև վանքի հարավարևմտյան կողմում մի քանի շաբաթ առաջ բացված «Տարոնական Ոգուն» նըվիրված գեղեցիկ աղբյուր-հուշարձանը, որի մեկենասն է փարիզահայ Մարտիկ-Օհան Տակառյանը:

Վանքի ներքին, հոգևոր, կազմակերպչական և վանական տնտեսության մասին մանրամասն տեղեկություններ տվեց վանահայրը: Կարճ հանգստից հետո Նորին Սրբությունը մասնակցեց իր պատվին կազմակերպված ճաշին, որը տեղի ունեցավ վանքի վանական սեղանատանը: Արժանապատիվ Ս. Եղիշե ավագ քահանա Սարգսյանը միաբանության և աշխատակիցների անունից մի անգամ ևս բարի գալուստ մաղթեց Նորին Սրբությանը: Վեր հանելով Հայոց Հայրապետի երեսնամյա հայրապետական փառավոր գործունեությունը,

արժանապատիվ տեր հայրը ասաց նաև, որ «...Ս. Գեղարդա վանք ուխտի եկողները և հապարավոր այցելուները այստեղ, մեր վանքում ականատես են մեր Սուրբ Եկեղեցու ճշմարիտ նյութական և հոգևոր վերապարթոնքին, որը արդեն երեսուն տարի է, որ շարունակվում է: Երբեմն փորձել եմ մեր օրերի եկեղեցական վերապարթոնքը համեմատել անցյալի մեր եկեղեցական վերապարթոնքների հետ, բայց հավատացեք, որ համեմատության ոչ մի ելք չեմ գտել, քանզի անցյալի նմանօրինակ եկեղեցական լուսավոր շարժումները դժբախտաբար եղել են կարճատև: Փառք Աստուծո, մեր օրերի վերապարթոնքը, սկսված Զերդ Սրբության մարգարեաշունչ տեսիլքով և միայն Զեր Սրբական անձին լուրհիստուկ լավատեսությամբ, արդեն շարունակվում է երեսուն տարի, որի համար մեր Եկեղեցին ու մեր ազգը պարտական են Զեր սուրբ Անձին: Մենք միշտ աղոթող ենք Զեր թանկագին կենաց համար: Թող Աստված երկար ու քաջառողջ կյանք պարգևի Զերդ Վեհափառությանը: Իսկ դրանում բոլորս հաստատ համոզված ենք, քանի որ Զեյ հետ է մեր ամբողջ ազգի անմնացորդ սերն ու աղոթքը»:

Վեհափառ Հայրապետը իր պատասխան խոսքում դրական գնահատելով Ս. Գեղարդա վանքի միաբանության ջանքերը հոգևոր սպասարկման ասպարեզում՝ պատվիրեց է՛լ ավելի ուշադիր և հոգատար լինել հավատացյալների նկատմամբ: Նայելով ծերունապարզ և իմաստուն մեր Հայրապետին, պզուռ ես, որ մեծագործ Հայրապետը իր անձնական երջանկությունը, երիտասարդ մընալու գաղտնիքը տեսնում է միայն իր Հոտի և մեր Ս. Եկեղեցու վերապարթոնքի և միասնականության մեջ, որը երաշխիքն է մեր ազգի և Եկեղեցու գալիք հաջողությունների:

Այսօր Հայոց Հայրապետը ուխտի է եկել Ս. Գեղարդա վանք՝ իր ուխտը նորոգելու և Ս. Գեղարդա բարձունքից դիտելու և հիանալու վերածնված մեր երկրի բերքառատ դաշտերով ու այգիներով և օրհնելու իր երկրի բախտը տնօրինող մեր սքանչելի ժողովրդին:

Ուշ երեկոյան Նորին Սրբությունը օրհնելով վանքի միաբանությանն ու աշխատակիցներին՝ իր ուղեկիցների հետ ուրախ տրամադրությամբ վերադարձավ Մայր Աթոռ:

Ուխտող կատար, Վեհափառ Տեր:

ԱՆԵՔՍԱՆԴԻ ՍԱՐԿԱՎԱԳ ՍԱՐԳՍՅԱՆ

